

MAIAN

L'ors su la puarte di cjase

Un boconon di animâl sui 140 kilos si fâs viodi a Maian: lu riclamin la mîl, lis pioris e - naturâl - lis orsutis

I fruts di Soclêf lu àn clamât Riki ma inte frazion di Priûs, dulà che al è stât calumât e fotografât pe prime dreçade al principi de Vierende, aromai al è cognossût di ducj tant che Bubu: o sin daûr a fevelâ dal esemplâr di ors maron dai 130-140 kilos di pês che di cualchi mêis al à cjapât a torzeonâ pai boscs de val Tiliement olsant fintremâ venturâsi al liminâr de planure. La ultime scorsade di Bubu lu à puartât di fat fin a Maian, dulà che al à distrut 30 bôçs di proprietât dal apicoltore Renât Garibaldi e si è mangjât 10 kilos di mîl.

Daûr dai studiôs de Universitât di Udin che i son daûr di mêis intai siei moviments judâts des segnalazions dai cjaçadôrs e dai agjents dal Cuarp forestâl, chest ors – un esemplâr di plui o mancûl 4 agns di etât, abil ancje di fâ 40 km al dì – al sarès il stes calumât tra Març e Avrîl a Soclêf, a Dimpeç, a Pani, a Verzegnins e inte zone fra Fors di Sore e Forni di Sot, dulà che si è fat protagonist di diviersis botinadis a dams di bôçs e trops di pioris.

Probabilmentri, al à sclarît il ricercjadôr Stiefin Filacorda (espert di grancj carnivars), par rivâ fin a

Maian, Bubu al è lâf jù dal canâl di Cune (Tramonts) lant vie pe val dal Arzin e la zone di Avasinis dulà che al è stât viodût passâ il Tiliment nandant, par rivâ ae zone des risultivis di Bars, dulà che al à lassât tancj segns dal so passaç.



“L'ors al è un animâl che al explore tant e in cheste stagjon al va in cercje des feminis”, al à sclarît Filacorda, che al à escludût ancje che Bubu al puedi rivâ fin in citât, stant che “pal animâl la zone industriâl e la autostrade a rapresentin une barriere masse dificile di passâ”.

E di fat, pôcs dîs dopo, il plantigrado al è stât calumât di un cjaçadôr intun bosc sot dal Sant Simeon tor des 13, duncje in plene dî: un fat straordenari, stant che di norme

i ors si movin dome di gnot par evità voi indiscrets e par botinâ bôçs e trops in sante pês. L'avistament diurni al sta alore a dimostrâ, daûr dai studiôs, che Bubu al veve prese di tornâ in mont.

Intant, a fâi compagne a torzeon in Cjargne, un altri ors zovin al è daûr a passâ inte zone di Turnieç: calumât in plui occasions inte frazion di Dieç e a Liussûl, chest secont esemplâr al ven, daûr de Universitât di Udin, de Val di Aupe e dal confin cu la Austrie viers Tarvis, dulà che si cjatarès ancje l'unic esemplâr femine che e fassarès confluî in zone cetancj dai presints masculins inte nestre regjon.

Ancje se mai un ors al jere lâf jù cussì in bas cemût che al à fat Bubu o Riki che dî si vueli, la presince di chescj animâi nol è ciert un fat gnûf pal Friûl Vignesie Julie: intai agns la nestre regjon e à regjistrât il passaç di diviers esemplârs e cumò a vivin chenti almancul une mieze dozene, ducj che vegnin de Slovenie dulà che a vivin plui di 500 ors che si movin suntune areeune vore largje e dulà che ducj – ancje i “nestris” – a tornin in maniere periodiche par incubiâsi.

il Diari 3

AN V, NUMAR 10
19 DI MAI 2010